

## La'ó Hamutuk


### Institutu Timor-Leste ba Monitor no Analiza Dezenvolvimentu

Rua dos Martires da Patria, Bebora, Dili, Timor-Leste

Tel: +670 332 1040

email: [info@laohamutuk.org](mailto:info@laohamutuk.org)

website: [www.laohamutuk.org](http://www.laohamutuk.org)



## Komentáriu husi La'ó Hamutuk kona ba proposta OGE 2013 ba setór “Agrikultura, floresta no peska”

23 Janeiru 2013

Ami apresia tanba orsamentu ba sektór agrikultura, floresta no peska aumenta kompara ho tempu pasadu. Ba tinan 2013, orsamentu ba Ministériu Agrikultura no Peska-MAP (USD 24,176 mil) sa'e liu 44% kompara ho tinan kotuk (USD 16,787 mil). Fundus husi Fundu Infrastrutura alokadu ba programa agrikultura no peska sa'e uitoan mós, husi USD 9,228 mil iha 2012 sa'e to USD 9,953 mil iha 2013.

Maibé bainhira ita haree ekonomia jerál Timor-Leste, kreximentu setór primária tun, no parte setór ida ne'e iha non-oil GDP tun mos. Dadus ba tinan 2010 indika katak setór agrikultura, floresta no peska representa 21.4% de'it husi non-oil GDP, kompara ho 30.6% iha tinan 2006 (Livru1 OGE p.18). Maske orsamentu ba agrikultura sa'e, maibé nafatin ki'ik tebes kompara ho setór seluk tanba la to'o 2% husi OGE. Fundus husi Fundu Infrastrutura alokadu ba programa agrikultura no peska nafatin representa parte ki'ik husi programa total (la to'o 1,5%). Maioria ema kiak hela iha area rural no depende ba agrikultura atu sustenta sira nia moris, entaun kualkér polítika atu hatún pobreza tenke fó prioridade ba setór ida nee. No mós, se ita investe di'ak iha setór ida ne'e, iha poténsia atu diversifika ita nia ekonomia, hamenus dependénsia ba importasaun, hadi'ak nutrisaun, nsst.

Problema seluk, orsamentu ki'ik ne'ebé la kobre nesidade setór agrikultura no peska fó dalan ba autór seluk atu influénsia polítika governu Timor-Leste.

Por ezemplu setór fini ne'ebé estratéjiku no hanesan baze ba produsaun ai han, governu Timor-Leste aloka osan atu sosa fini tokon USD 3, maibé projetu husi AusAID ho título “Seeds of Life” fó fundus ba MAP tokon USD 5.175 ba tinan 2013 (orsamentu projetu ho montante tokon USD 34.104, Livru5 OGE p.60). Rezultadu, La'ó Hamutuk haree katak liu husi “Seeds of Life” iha influénsia boot ba prosesu introduz fini variedade foun no agora daudauk, staff “Seeds of life” mós envolve direta ba hakerek Polítika Nasionál Timor-Leste kona ba Fini inklui dezenvolve mós Lei Fini. Ami nia hare, MAP ladún iha kapasidade atu halo monitorizasaun no avaliasaun didi'ak ba projetu ida ne'e.

Ministériu Agrikultura no Peska la enfrenta de'it problema ho orsamentu, maibé falta mós polítika no vizaun sustentável ne'ebé klaru. Governu promove modelu agrikultura ne'ebé ho kustu boot no presiza input barak hanesan introdus traktor, fini, pestisida no adubu kímiku, no mós governu nia estratéjia atu atinje seguransa ai han ladún iha balansu.

Iha orsamentu MAP ba tinan nee (2013), tokon USD 3.497 (liu 14,4% husi orsamentu MAP total) ba kombustivel, operasaun no manutensaun de veíkulu, inklui liu tokon USD 2 ba

traktoraes ne'ebé mak la adekuaadu ho topografia Timor-Leste nian no ho kapasidade finansieru inklui téknika husi toos na'in rasik.

Input kímika (adubu no pestisida) hetan USD 600,000, maske ita iha poténsia boot atu uza fo'er husi lixu sira ba halo kompos orgánika (duke sunu fo'er no halo poluisaun barak) no esplora téknika ne'ebé sustentável no *ramah-lingkungan*. Se ita halo komparaesun, USD 30,000 de'it ba item "kompos lokál".

Governu fó prioridade liu ba introdusaun fini *improved*, fini ho standar "high yielding" no fini íbrida (cf. projetu Seeds of Life; programa hare íbrida husi governu China) ne'ebé mak karun, presiza input ka atensaun espesífiku, la bele rai kleur inklui la fó rezultadu produsaun dí'ak liu duke fini lokál ne'ebé eziste kleur ona iha Timor.

Atu atinje seguransa ai han, governu fokus liu ba aumenta rendimentu ho meus uza input barak duke haree fatór seluk importante liu hanesan aumenta efisiénsia fatin rai ai han no fini (storage), edukasaun kona ba nutrisaun, diversifikasaun ai han, konservasaun no rejenerasaun rai (soil fertility), problema asesu ba konsumidór/produtór, infraestrutura rural (irrigasaun...), formasaun ba agrikultór sira kona ba *best-practices* nsst.

Parese katak iha tinan 2012, produsaun haree no batar (hamutuk) boot liu duke nesesidade konsumu nasionál (Livru1 OGE p.17), entaun tenke rekoñese katak asuntu seguransa ai han la'ós kestaun rendimentu ka produsaun de'it.

Governu Timor-Leste ladún fó atensaun ba setór Pekuaría no Peska ne'ebé iha poténsia boot tebes atu hadi'ak nutrisaun iha rai laran. Setór rua nee hetan respetivamente USD 925,240 no USD 123,515 de'it husi orsamentu alokadu ba "material e forneseimentu operacionais", mais USD 52,000 no USD 51,000 husi orsamentu alokadu ba "serbisu operacionais".

Tuir La'ó Hamutuk nia hanoin, Ministériu Agrikultura no Peska tenke promove modelu dezenvolvimentu agrikultura "low-cost" no "low-input". Labele tuir modelu "green revolution" husi India hanesan Planu Dezenvolvimentu Estratéjiku hateten, tanba iha ona evidénsia katak modelu ida ne'e la sustentável. Timor-Leste tenke aprende husi esperiénsia nasaun seluk inklui India ne'ebé agora enfrenta problema sosiál no meu ambiente boot; toos na'in sira oho-an tanba la bele selu fali kréditu mak sira foti atu sosa input, bee no rai hetan poluisaun tanba uza pestisida no adubu kímika, variedade fini lokál barak mak lakon tanba uza fini indústría ne'ebé standar.

Ministériu Agrikultura no Peska tenke mós defini prioridade loloos. MAP nia prioridade atu "promove kreximentu ekonómiku" ladún relevante tanba dala barak kreximentu ekonómiku la signífika no la permite hamenus pobreza ka hasa'e qualidade moris. Dala ruma kreximentu ekonómiku bele sai dalan atu atinje dezenvolvimentu maibé la bele sai objetivu. Tenke mós adopta aproximasaun global bainhira haree asuntu ida, atu bele halo polítika ne'ebé konsistente. Ezemplu, kualkér polítika atu promove produsaun ai han lokál tenke mós akompaña ho polítika ne'ebé maka hamenus importaesun ai han no mós promove konsumu produktu lokál, MAP (no Ministériu hotu-hotu) nia polítika tenke korrente ho objetivu atu proteje meu-ambiente, nsst.